



Martin Peder, Cavorgia

*04-11-1923 †12-09-2004

La dumengia suentermiezdi ei il cuors dalla veta da Martin ius a fin cheu sin tiara. Dapi in temps piteva el dil cancer. La mort ha deliberau el da siu pitir.

Martin ei naschius ils quater da november 1923 en l'ucliva da Cavorgia. Il defunct ei carschius si en ina famiglia purila. Els fuvan 7 fargliuns. Suenter haver frequentau la scola obligatorica, ha ei tuccau da semetter vid la lavur. Pli baul duvrava la gronda part dallas famiglias muntagnardas igl agid da lur affons a casa. Da quels onns deva ei strusch maschinas, la lavur fuva greva e ruha e mintg' agid fuva bein vesius en casa ed ord casa el menaschi puril. Aschia ha ei era tuccau al Martin da star a casa e segidar culs geniturs. Pigl auter eis el ius bia stads ad alp nua ch'el fageva pastur e signun. Ad alp ha Martin giu da turschar bein enqual caldera emplenida cun latg e lu pèr en tschaler, leu deva ei da volver ina massa magnuc, d'ensalar e mirar che gie tut gartegi.

Vegnend il Martin els onns da pensiun pren el pli lev. Il schaner 1993 serenda el a Sedrun en casa s. Vigeli, nua ch'el apprezzescha il niev dacasa e la cumpignia. Dasperas fageva el mintgadi sias spassegiadas ni serendeva cul moped encunter Cavorgia per far ina viseta a ses dus frars, il Luis ed il Nazi. Avon in temps ha sia sanadad entschiet a disdir. Martin ha stuiu serender el spital, ina via stentusa ha entschiet, igl ei vegniu pli quiet cul Martin, la vusch ei vegnida brausla, il tgierp fleivels, el era ussa ligiaus vid il letg. Il Martin fuva denton in bien, cuntent ed engrazieivel pazient. Sia buontad e cuntentientscha deva buca breigias al persunal.

Ussa ha Dieus spindrau il Martin, lein sperar ch'el possi guder la gloria dil parvis. L'urna da Martin Peder ei surdada ella tiara dil santeri a Sedrun en fossa da siu frar Ignazi ch'ei morts ils sis da fenadur 2004.

Els ruaussien en pasch.